





ル 5
3525
16







門 凡 5
號 3525
卷 16

早稻田 大學 圖書館
號 36.9.26 雙
藏 書

揚州北湖續志卷四 甘泉 阮先慎齋輯

揚州 陳恆和書林刻



生

年甘泉山居民蔣國泰妻蘇氏一產三男齊

常春甘泉諸生年八十二精神健壯恭遇道光壬午

恩科 欽賜副榜

王德橋農人王世德年八十六歲四世一堂

老霸橋許子德年九十二歲五世一堂遵 新例得

請建坊

公道橋北鄉顏某年九十三歲無疾而逝

李家橋周以順年九十四歲騎驢往來於市越二年卒

道光己丑正月二日先參軍公年正八十集鎮中老友爲豐樂耆英會與會者田蔭三文學壽八十常享金太學壽七十四常序堂壽七十九尤依文壽七十二陳上臨文學壽七十二陳寶山壽七十常輔軒文學壽六十九呂相國壽七十四是日聚於私第之東圃鎮中不過數百戶而士林中猶多耄年健在者時相國 予告歸里壬寅春正月二十

日爲七十九歲生辰亦來道橋作竹林茶隱故事于湖王太守澤時年八十四相國邀太守先考聚于桑榆別業論魯頌三壽作朋古訓洵盛事也

節壽婦孫范氏壽九十六子姓蕃衍

張滙母氏年九十五與孫母居相近皆同時節壽之至大者也

人物

載入前小志者未重錄

孫玉甲生於北湖由江都廩膳生以人品端方才猷
可試三院保薦雍正二年 廷試第一官福建南
安縣

文起字鴻舉世居北湖始居城起少寒峻精算學縱
橫鈎稽纖毫不爽凡有營造大役當事罔不延起
董其成尤諳鹽筴鹽務諸長吏交椅重之子二鍾
英議敘提舉心芳湖北候補知府孫如璋附貢生
今亦甚式微矣

管一清字配甯才藻穎異乾隆己未進士官魏縣知

縣遷增城縣知縣孫粵秀字南英少孤年少擅文
名以優貢舉順天壬子魁選工啟事授奉賢訓導
病不能赴尋卒

阮樞良字孚循江都人居北湖之公道橋幼孤事節
母厲太恭人以孝聞撫兄弟子如己子嘗置義冢
十數處以濟貧者值歲歉施粥食醫藥益力湖口
橋久圯樞良造舟以濟往來舉鄉飲大賓避不應
子時衡藻衡孫玉堂樞良以玉堂貴 贈招勇將
軍時衡字宗尹好善樂施一秉父教以玉堂貴
贈招勇將軍又以曾孫元官 贈光祿大夫

府志篤行

阮金堂字宣廷儀徵增廣生績學工古文精于音律
善行草書居北湖之公道橋嘗獨力修橋路人感
之著容髯遺詩若干卷行世子二承春鴻皆諸生
承春嘗應試泰州或有遺金門首者待其來與之
無德色事詳瀛舟筆談有著禮堂詩集顏子內外
篇竹嶼文鈔行世子天保

府志文苑

王季驄字雨乘縣學生其兄仲駮字星駕篤行詳府
縣志及前小志驄孝友素有隱德篤信樸誠鄉里
推為長者年八十阮中丞書既壽且康扁以贈之
題曰吾鄉鴻儒端士心儀者三十年可想見其人

矣年八十五卒子四肖堂詩詔郡學生訪縣學生
詔子開益縣學生

周錫祉字介繁武學生倜儻通經史年八十精神不
少衰

吳康字少文太學生閉戶讀書以詩酒自娛講貫於
唐宋以來諸名家者近三十年以病不能應舉子
試著白茆草堂詩鈔子景澄縣學生景渲

焦循字理堂一字里堂嘉慶辛酉科舉人以孝友篤
行著恬淡寡欲不干仕祿居恆布衣蔬食不入城
市以著書爲事湖山爲娛壯年卽名重海內嘗一

應禮部試不第歸卽閉戶潛修撰雕菰集二十四
卷其餘著作甚富惟易學三書四十卷孟子正義
三十卷行於世子廷琥字虎玉廩膳生績學能讀
父書惜相繼而歿

陳先震字守堂又號侶蘭乾隆辛卯科舉人公車六
上未第乙卯 恩科大挑奉 旨加恩得籤掣國
子監學正嘉慶乙丑會試加翰林院檢討戊辰會
試加編修年八十一卒於京邸自甘勤儉不事浮
華自幼至老一言一行悉筆之書有年譜一卷遺
訓子孫卽司馬溫公所謂事無不可對人言者也

子三傳灑傳渭傳汝邑庠生

陳師慶字餘廷號煉堂晚號鶴樵嘉慶辛未進士道光壬午選授呈貢縣知縣陞署昭通府分防同知服官有政聲以是年冬卒子恩溥廩膳生工詩

周正新字殿英廩膳生績學早卒

虞志銘字啟東淶洋湖人乾隆間移居赤岸之東性孝好善初地有小橋不便往來志銘首出多金倡而大之後人遂以橋名居民漸多謂之橋頭鎮三十外喪偶不再娶生一子名學文教之讀書入學八十餘猶能課農抱孫孫同芬

范章桐字雨秋縣學生工書法善畫蘆雁晚年更老勁自成一家以字畫作生活計一時珍之年七十

九

常海天字荷衢號子秋縣學生工詩善畫卓犖不羣入學後屢以文賦見賞宗工海天爲副車識之侄進士陳師慶之壻且師事之以故詩文具有淵源惜其早卒也其弟海鵬僅得其詩百首輯之名曰西園剩稿子霖

靳畚字秋田名諸生工詩好友負性倜儻不羈與同時鄭板橋最善嘗爲校刻板橋詩鈔

李謙字午唐居甘泉山鎮聰明好學日以詩字為性命年三十而卒著有遺稿一卷

阮承裕字衣谷乾隆甲子科歲進士孝友醇篤以時文教授里中里中讀書之士半出其門甘泉令某重其行以孝廉方正徵之不就著有文稿

謝玉字芸莊國子監生晉太傅謝安之裔孫工詩畫善書法著有東山書屋吟稿

孝友

焦淇字衡水黃珏橋人性至孝偕其婦承事庭闈不遺餘力兄弟七人最相友善無違言飾節見雍正

前小志列家述茲特表出

湯世泰字三陽國學生世居方家巷世泰為遺腹子其母氏朱與伯母氏曹俱一門苦節世泰曲盡孝道至性樸誠以耕讀起家陳明府文述以其孝達於朝

孫楨三歲而孤賴母苦節教誨成人母沒時年九十孝子年已七十抱棺哭泣死於苫次純孝終身輿

情允洽 旌隨節母享祀專祠

陳道字適堂江都文學

湯仲字若愚國學全妻盧氏

房永興郭癡睦四俱見前小志故未重錄

節孝

潘氏王聘妻聘早卒氏守節事姑勤儉持家撫子國裕國祜成立乾隆二年年八十一高太守士歛書筠節松齡扁以祝之今赤岸湖王氏蕃衍其子姓也

陶氏宋時林妻年三十而寡守節終身前小志所載節婦宋鴻妻葛氏卽其祖姑也

曹氏湯九錫妻夫亡苦志守節與姑共撫小叔九經成人乾隆二年 旌表

朱氏湯九經妻年十六適湯未幾九經卒氏有遺腹

踰月生子名世泰承姆曹氏之教守節撫孤卒年七十一道光三年有司以朱氏節世泰孝請於朝俱得 旌表

王氏周德隆妻夫沒守節三十五年道光五年卒里人立石碣於桑園墓側

許氏陳傳泗妻族出錢唐氏年十七適陳次年生子正本泗遊幕十二年始歸歸十二日而卒氏在母家守節針黹度日數十年正本隨族叔在公道橋讀書入學積館貲購屋迎母歸養今七十有餘道光二十七年 旌表

王氏卞亭蘭妻十七亭蘭歿孀居守節廿六年卒

張氏庠生王訪妻年二十而寡守節三十餘年繼子開勳補國學生請 旌建坊

朱氏王世豐妻年二十一歲適世豐次年守節孝事孀姑寢食不離姑卒哀毀輟食聞者流涕

虞氏王桂芳妻夫年二十卒矢志守節有以家貧勸其改適者氏水漿三日不入口父母從其志一日鄰火氏爇香跪禱求一椽之庇以爲供奉祖宗之地曰室焚則身與俱焚耳火即止人咸以爲苦節之報道光二十七年 旌表

湯氏房如川妻嫁未數月如川歿氏守節事姑以孝

聞

金氏湯源福妻福卒氏矢志守節後邀 旌典

李氏江有祿妻夫亡氏守節力田年七十有三

胡氏徐有祿妻夫亡守節時有勸改適者氏以死自

誓奉翁姑以孝聞

徐氏王乙璠妻夫卒守節年逾七十其女許字高郵

胡大鵬亦以節終載高郵州志

胡氏王珍妻夫亡氏守節撫孤

謝氏焦發祥妻年二十三歲守節茹苦道光二十七

年 旌表

阮氏王魯堂妻魯堂積學早卒守節事姑撫子濤成
立

阮氏王夢金妻夫亡氏年十七慟欲身殉姑黃氏以
其有遺腹勸慰守節踰月生一女悲傷幾絕深以
不能姒續為憾黃氏旋以病卒氏哀毀成禮以女
托大姆繼大姆子為嗣曰吾不欲生矣遂絕粒而
逝以不合例未得請於 朝戚里哀焉

潘氏孫懷禮妻嫁數月夫卒氏守節自誓奉翁姑克
盡孝道里黨稱之

常氏阮恩宏妻年十八恩宏卒氏撫孤守節

周氏阮恩灝妻年二十六守節事孀姑以孝聞

朱氏王廷棟妻夫亡撫孤守節

張氏農人仇姓妻夫亡守節數十年率子力田誦經

茹素其媳陳氏亦守節繼志

高氏許字吳宏禮宏禮歿氏年二十適吳撫侄立中

為子守貞三十一年不茹葷不衣帛里黨稱其賢

其侄欲為之請 旌氏止之見蜜梅花館集

宋氏族出高郵許字赤岸湖儒童王開泰泰於嘉慶

十二年病卒氏幼失怙隨母在鄉聞訃哀痛自投

於水家人救醒即自郵來夫家奉事翁姑撫養嗣

子督耕課績克儉克勤嚴寒酷暑日夜不解衣者

數十年隣里稱之援例請 旌建坊並入高郵州

志

馬氏公道橋人許字談怡昌號雲仲雲仲本孝子因

勸父故投江死氏聞訃哀愴絕而復甦遂適談門

守貞焉工部主政程鎮北太夫人著有馬貞女傳

刻程母文集

王氏庠生曾玉輝妻年二十八孀居至道光十五年

卒守節三十一年

崔氏文章施國勳妻守節待 旌

胡氏儒童俞宏業妻夫故年二十四撫繼子允吉讀書成立道光十八年請 旌坊建甘泉山鎮

羅氏朱文彬妻夫故年二十七守節道光十九年 旌表

周氏布政司理問談春培妻年二十五夫卒守節待 旌

徐氏廩生周殿英妻年廿八夫故守節今三十年

顧氏陸常山妻年二十六歲夫故守節撫孤孫婦孫氏亦守節繼志

許氏國學生周錫齡妻二十七歲孀居侍翁姑克盡 孝志

周氏盧姓妻守節待 旌

毛氏李家橋人許字某氏未婚夫故時年十八有勸其改適氏遂水漿三日不入後從其志貧苦終身六十五歲而卒

王氏邑庠生王子猷之妹謝楷之妻年二十二適謝氏未逾載夫疾卒得遺腹子撫養幼讀守志待 旌

張氏儒童阮嗣舉妻年十九歲適阮氏二十七歲夫

故守節二十九年故年五十六歲道光二十七年

旌表

李氏許字黃國安夫故適黃門守貞哀慟成病而卒
許氏歐陽長慶妻道光二十七年 旌表

吳氏呂角妻年二十六夫故守志家極貧孝事孀姑
姑病親嘗湯藥衣不解帶者終歲卒年六十餘道

光二十七年 旌表

葉億宣妻常氏年二十四夫故守節道光二十七年

旌表

常慶堂妻宋氏夫故守志道光二十七年 旌表

陳維鶴妻張氏年二十七夫亡守節孝養翁姑道光

二十七年 旌表

常連發妻吳氏年二十守節道光廿七年 旌表

徐氏許如松妻道光二十七年 旌表

居氏職員常坦妻夫故苦節自守道光二十七年

旌表

李氏趙有貴妻道光二十七年 旌表

王氏周天慶妻守節道光二十七年 旌表

常氏儒童阮蒼培妻年二十三夫故守節三十年道

光二十七年 旌表

張氏徐文秀妻守節道光二十七年 旌表

丁氏盤古山人許字俞長椿為妻長椿為鄉善人俞

弼元之孫天申之子十三歲早逝氏年十五聞訃

哀絕復甦適俞門守貞家貧支絕孝事孀姑現苦

志待 旌表

揚州北湖續志卷四終

揚州北湖續志卷五

甘泉

阮先慎齋輯

揚州 陳恆和書林刻

歲時

歲暮家人宴集曰潑散韋應物詩田婦有嘉猷潑散
新歲餘

除夕先一日換桃符貼春聯元旦鄉人具衣冠望空
跪拜復至各廟敬香然後隣里親族互相拜賀早食
湯團糕饅之類隔年飯不用新炊自是有酒食往來
謂之春卮

正月十三日於社廟前立一長竿以竹片編架數層

懸燈百餘至十九日乃已二月初二初三日亦然鄉人有望子者則親友竊其燈以饋其家設酒待之生子轍還滿架燈於神前致謝焉

清明時家家修壟增土墓祭不絕祀新墳者俱在社前俗云新墳不過社是日家家先祀祭祖七月望日及冬至日亦然

端午日解粽兒女佩丹符臂上繫五色絲

鄉人謂之百索

酒用菖蒲雄黃婦人以葵榴艾葉雜花簪髻男子亦以菖蒲艾葉插髮際午則棄之午時貼桃符五毒於室內

中元孟蘭會用僧道施食利孤晚挑紙鏤墳壟間焚之或放之河中如荷燈然

中秋夜設瓜果祀月兒女羅拜市月餅相遺亦有以粉麵作圓餅者

重陽相餽用糕市糕者作麵羊或以五色紙剪爲小旗

歲暮各家以禮物相餉謂之歲禮除夕守歲設松盆燒爆竹達旦二十四日夜用飯糟果糖焚竈疏謂之送竈除夕日再祀曰接竈

丁家莊有農佃一家茹素祀竈最誠每於除夕日灑

掃潔淨焚香跪祝夜間竈神卽帶稻菽之屬置於竈
上元旦起視所帶之穀及所置之處以驗歲之豐歉
每歲試之多應

金石

劉厲王中殿殘碑四石在甘泉山惠照寺阮相國昔
年訪得嵌於府學明倫堂東壁

珠湖草堂築圩堤得古鏡二一菱花式一團如滿月
龜紐古色斑爛土花駁蝕惜無年月可考

公道橋司徒廟最古殿前有拜石好事者俯聽之有
聲相傳石下有明季誠意伯劉基詩然未敢有啟視
之者

九龍岡社神廟內有古磚注萬厯三十五年建爲中
境崇禎十三年重建

傲姑寺有鐘寺圯鐘自飛去

乾隆五十年大旱河水盡涸道橋湖邊掘得一石上有常濟橋三字至今常氏珍藏之

秦泰山殘字漢西嶽華山碑三國天發神讖碑阮相國重摹勒石建於北湖祠塾

露筋祠米元章碑乾隆三十三年楊太守重英重勒石

昭佑龍王廟碑在雷塘阮氏墓廬

太平圩掘得宋紹定六年陳氏二孺人碑碣一地券二其碑碣石方一尺許載周姓長子名行簡登賢書

其餘字多不可辨地券磚刻字塗朱啟視之顏色不變載大宋國淮南東路太平鄉方陵前塚從前志書無知此鄉爲太平鄉者

經籍 前志已載者
概不重錄

嶺南物紀一卷林惠堂集二十六卷楊椒山樂府一

卷揚州鼓吹詞序記紅集一卷吳綺

許給事奏議許承宣

獵微閣集許承家

尊屏實詮西湖游草揚州夢詩集梅厓詩集常典

容髯小草阮金堂

禮堂文集竹嶼詩鈔阮承春

六行堂詩集焦輪

肩為詩二卷焦驄

蝸牛草堂詩一卷焦永

穆軒詩一卷管一清

春秋例三卷癸辛雜識一卷詞說一卷甌山詩稿八卷管粵秀既齋詩集常碩廷

十三經校勘記經籍纂詁并補遺一百六卷 國朝

碑版錄二十卷山左金石志二十四卷兩浙金石志二十四卷積古齋鐘鼎彝器款識十卷兩浙防護錄兩浙輶軒錄四十卷補遺十卷浙江圖考一卷海運考二卷海塘圖考十六卷曾子十篇注釋四卷衡文瑣言一卷詞科掌錄十六卷廣陵詩事十卷小滄浪

筆談四卷瀛洲書記四卷定香亭筆談四卷石渠隨筆淮海英靈集二十二卷八軛吟館刻燭集八卷詁經精舍文集十四卷擘經室集二十四卷擘經室續集擘經室再續集琅環仙館詩錄八卷疇人傳四十八卷阮元

廣陵詩事補遺瀛洲筆談十二卷珠湖草堂詩鈔四卷琴言集阮亨

忍冬齋集焦士紀

加減乘除釋八卷天元一釋二卷釋弧三卷釋輪二卷釋橢一卷羣經宮室圖二卷六經補疏二十卷開

方通釋一卷李翁醫記二卷書義叢鈔四十卷雕菰樓易學三書四十卷易話二卷易餘籥錄二十卷易廣記三卷注易日記三卷毛詩草木鳥獸蟲魚釋十卷陸璣疏考證一卷毛鄭詩異同釋三卷禹貢鄭注釋二卷論語地理四卷孟子正義三十卷自訂雕菰樓集二十四卷賦一卷詩四卷文十九卷仲軒詞二卷紅薇翠竹詞一卷易餘集一卷里堂道聽錄五十卷揚州足徵錄六卷邗記六卷北湖小志六卷焦循密梅花館集焦廷琥問夫文稿阮承裕

蟄室集四卷山左筆記一卷阮鴻

白茆草堂詩鈔吳康

倚槐亭詩集歐陽錦

西麓隨筆常識

梯雲遺草一卷何方衢

侶蘭年譜陳先震

琴綠軒集阮天保

南游詩草一卷寄鷗館文集十卷陳恩溥

西園剩稿常海天

雲莊文集四卷詩存三卷北湖竹枝詞一卷碧香吟

館筆談二卷北湖耆舊集六卷阮充

南園吟草談春元

孝經義疏阮福

硯農偶錄何鼎

愛蓮書屋文稿周殿英

碧蘿吟館偶存談恩誥

聽香集阮貴生

揚州北湖續志卷五終

揚州北湖續志卷六

甘泉 阮先慎齋 輯

揚州 陳恆和書林刻

藝文

北湖人多專集茲所錄者或北湖人之文或文
之有關於北湖者聊采一二焉

聽翁自傳

吳 綺

聽翁出於延陵逸其名與字仕至二千石多惠政不
畏疆禦以忤上官投劾歸歸而貧甚不能自給長偕
江子辰六醪金築室於廣陵之南門曰天地間亭翁
於是乎有居癸亥遊粵東制府吳畱村贈以買山錢

歸得粉粧巷趙氏之廢圃而移居焉翁於是乎有園
又以錢二百緡得東陵田七十畝翁於是乎有田田
種秫與豆僅足供半歲食居以移後復爲他人所有
園荒無樹木花卉有索翁文與詩者多以樹木花竹
爲潤筆費不數月而成林因名之曰種字林翁於是
偃仰其中春而花秋而月偕內子江夏君以詩酒自
適雖至屢空泊如也常曰吾才不逮古人而冒忝方
州性嬾不能爲導引術而年及古稀不事家人生產
而萊妻伶妾無北門之謫諸兒子不營利祿而皆拈
弄筆墨粗能爲詩古文詞吾知造物之與我已爲過

矣於是修短衰健聽之天以利鈍榮辱聽之人以
是非毀譽聽之千百世而後流行坎止吾何心焉故
自號曰聽翁且翁常病目不能視得古今人佳詩文
者輒令門生兒子輩誦而聽之有人善談稗官及黃
者則焚香以聽之有善恢諧滑稽足以解頤及髻童
妙妓調絲品竹者則浮大白以聽之鶯之囀鶴之唳
鳥之吟春而哢曉桐之雨松之濤竹之露啼而風笑
也則據繩牀凭烏皮几以聽之聽於是止焉若乃臧
否人物譏談時政者翁則掩耳熟睡如弗聞矣翁性
坦率好賓客與人言無所隱有不如意者卽怒罵然

揚州叢書 十卷
胸中無畱滯焉喜作詩務言其性之所近不甚規模
初盛諸體格爲文章好作孝穆子山語見世之優孟
韓歐餽飭班范者不屑爲也所作填詞小令兒童女
子皆能習之有毘陵閨秀日誦其把酒囑東風種出
雙紅豆二語以爲秦七黃九不能過也故又號紅豆
詞人云

誥封光祿大夫戶部左侍郎加三級阮公湘圃暨妻
林太夫人合葬墓誌銘

陽湖 孫星衍 伯淵

嘉慶十年星衍遭大母許太恭人之喪自德州馳書
乞浙江撫部阮雲臺先生表墓之文以傳大母節行

書到撫部於閏六月丁光祿公艱歸里以星衍年家
子辱知契最深佯來亟命爲文誌墓并篆蓋將乞翰
林侍講梁山舟先生書之星衍不敢以不文辭按狀
公姓阮氏諱承信字得中又字湘圃江蘇揚州府儀
徵縣人先世居陳畱尉氏南宋至元明一遷江西之
清江縣再遷江南淮安府至明嘉靖間有諱巖者始
遷揚州生子榆林衛正兵千戶諱國祥國祥子文廣
文廣子贈武德將軍秉謙爲公高祖子贈招勇將軍
諱樞良爲公會祖子贈光祿大夫時衡爲公祖父子
康熙乙未科武進士歷官湖北湖南河南衛輝營參

揚州叢考 七
將贈光祿大夫諱玉堂爲公父配汪太夫人繼配江
太夫人實生公有庶長兄二曰承義承仁嗣兄一曰
承德公生將門少善讀書好春秋左氏熟悉資治通
鑑古今成敗事嫻騎射能挽強發矢洞達習相馬法
乘騎馳千里補國子生家無儋石儲意泊如也性伉
爽好施與嘗暮行蹴得囊金數鎰坐其處至夜分俟
返而求者付之客游宣城除夕有貧者或於火燬數
十家公罄所蓄資給之使結舍年三十一生撫部公
擇師教讀甚嚴親授古文辭稱曰讀書當爲有用之
學徒鑽研時菽無益也撫部以名諸生舉鄉薦游學

京邸通經學訓詁聲名籍甚中乾隆五十四年進士
官翰林大考第一擢少詹事以 講官供奉南書房
由正詹擢兵禮戶部右左侍郎先後提學山東浙江
皆迎公就養教子以受知愈深宜以勤慎效萬一在
禁近當戒不密校文當無所不收勿以一隅之見去
取致有棄材也 高宗純皇帝嘗因撫部公入覲問
及父年奏以五十有八 上曰年紀甚小時 聖壽
八十餘故云然嘉慶四年四月 誥封榮祿大夫戶
部左侍郎加一級其秋晉封光祿大夫冬十月撫部
公拜浙江巡撫之 命明年迎公之節署是時聞浙

揚州叢刊 七
海盜合夷匪肆劫爲患公指畫方略授撫部公奏製
巨艦大礮遏禦之撫部公會三總總兵進勦夜有颶
風大雨乘勢擊覆盜船無算又設伏海島獲其酋豪
已下數百人自是夷匪不敢窺浙海閩盜黃葵等先
後降放出難民公曰此活千百人勝於擒獲功矣六
七年浙東西水災公前後出銀萬四千兩賑活飢民
命曰此予省數年養廉所儲今得其用矣先是公以
阮氏自明季遷郡城公道橋無宗祠乃捐貲建祠室
祭田延師設塾課子弟之能讀書者又建廬雷塘祖
墓之側以爲展謁依墓之所及年過七十復呼撫部

公語曰孝經守其宗廟爲卿大夫之孝禮君子將營
宮室宗廟爲先今士大夫築園池美居室吾不爲也
乃命依 國朝會典一品家廟五間三門祀四世之
禮建祠堂於揚州選樓街祭田祭器咸備今年夏公
始從浙中歸將奉粟主入廟行至吳門疾而返見撫
部公淒然淚下曰吾竟不能奉主入廟耶乃遣孫常
生代行奉主歸公病增劇以閏六月丙申日酉時卒
於節署春秋七十有二生平正直剛毅心事光明不
爲欺人語而天性慈仁嘗稱曰孝友睦婣任恤周官
之行士大夫不可以廉儉謝責也配林夫人福建大

揚州叢刊 北海
田縣知縣廷和公女通書史明古文大義逮事祖姑
盡孝動止依禮法遭舅及祖姑之喪不肯從俗延釋
道治懺醮曰吾阮氏林氏皆儒家無用此嫁夫妹治
裝甚豐曰無減先姑存日也撫部公六歲就傅讀書
期期口喫夫人授讀曰爾毋遽姑從我緩緩讀之乃
成誦如流累贈一品夫人乾隆四十六年八月壬申
日卒於里第得年四十有七子一元巡撫浙江等處
兵部侍郎兼都察院右副都御史孫四曰常生六品
蔭生曰福曰祐曰禕將以今年十二月乙酉日合葬
揚州府北雷塘祖塋之側

銘曰殷國受民陳畱嬪代烈烈華望遷於淮海明德
之後篤生耆英武事徹札文學橫經高門有容大儒
之効用晦以顯作忠移孝 錫命玉關 問年彤庭
珥貂晨省擁節郊迎潢池埽氛餘腥覆盜折衝樽俎
寢門有教拯黎發粟活人萬千損家紓災不費禁錢
乃營丙舍乃立宗祠禮器新碑隋賢舊宅言歸梓里
嬰疾葦杭易簣所憾敬宗不忘孟光比德宣文傳學
佳城同室彤史有作魯祔學制古燕觀禮存不朽之
石無媿之文

晉授奉直大夫布政司理問加二級北渚阮君墓表

阮元

元從叔阮公諱鴻行二字達陽又字湘南號北渚七十後自號蟄室老人三世祖官榆林衛千戶始卜居揚州北湖元高祖與公會祖諱樞忠爲兄弟始分房樞忠公通經史兼善騎射康熙庚戌科武進士分發江蘇撫標中軍學習子三長諱殿衡習文舉業考授州同知爲公之祖次諱匡衡癸未科武進士官滁州衛守備以官贈曾祖武德將軍三諱士衡雍正丙午科武舉人父諱金堂字宣廷儀徵學增生以公職贈奉直大夫宣廷公生二子公其仲也乾隆丁酉六

歲就傅十一歲以弱疾輟書就醫三年甫愈仍力於學從堂伯衣谷明經學庭訓甚嚴雖愛憐甚摯而勗以讀書作文不稍寬由是益淬於學丙申冬宣廷公以痰嗽成疾公侍湯藥衣不解帶公母張太宜人割股以進事載續揚州府志節孝中逾年宣廷公卒公哀毀骨立慎始慎終克盡其孝以家貧無以爲養越一年就館於外遙師姚雨田廣文每入城謁師與程中之方贊元方月槎爲友相砥礪廿一歲張太宜人衰病公不忍遠離遂移館於本鎮吳氏恆暮薄暮至家省視吳氏以公訓誨嚴勤延待十年之久得館地

以力學藉館金以養母公於胞兄載陽公極友愛已
酉歲始受知於豫堂胡侍郎同入學而宣廷公已下
世十餘年孀親茹苦得以稍慰壬子鄉試一邀房薦
癸丑因元官詹事張太宜人命公入都應順天之試
俄元奉山左學政之命公之年與元相若應童子
試時卽相善且知公品學優長以故延請衡文公偕
行至署按試青菜等府靜坐高樓閉門閱卷不草率
寓今日初心之意歷城時幕友未多元惟公是賴夏
試畢始與里堂焦君秋平黃君登岱賦詩入曲阜
聖廟觀禮有山左筆記一卷二年元調任浙江學使

與朱椒堂端木子彝陳曼生爲同幕有幕中閱卷稍
率者公微窺之索落卷置室中夜燭達旦披覽再三
偶得佳卷因歎曰此佳士也迫促風簷甘苦吾數嘗
焉微吾又屈矣亟持告學使元果卽拔之時元虚心
禮士而內嚴察因叔公正明察之力得士無錯悞至
院棚關節元防杜至密至金華巡捕搜得小人私書
云衙門內大人叔子一關難過可見助力矣公三十
九歲元撫浙隨先考光祿公商立義舉建族祠修祖
墓立田贍祭置禮祀洲蘆息定規條族中祠墓祭埽
婚嫁喪葬敬節養老義塾考費等事咸備數十年矣

公卒日元往哭奠書輓聯云魯浙試文章杜絕院棚
關節江湖種蘆稻籌開祭瞻章程紀實也甲子四十
五欣然赴省試因瘧未果乙丑春先考命元建家廟
於揚州屬叔董其事公落成之初先考遴公與撫署
中林季修皆有才欲公納知縣資公曰吾無資毅然
不可且曰吾不可苟合於人作吏非所宜也且族無
多人當佐中丞治家政睦姻諸大端可已議遂止丙
寅冬十月張太宜人以疾卒公哀毀如初己巳公年
五旬辦江洲事有鎮江某恃強爭佔訟於鎮江府府
得賄倚其丈人托津後大府委勘乃服誣公不忍窮

以律制惟剖明定案而已繼乃決計歸家以靜爲樂
矣自撰小歇記以見意壬申五十三歲生長子克甲
戊年生次子先丙戊年生季子充公性儉約惟老屋
數椽積書滿壁晚年罷舉業納布政司理問始得贈
其親道光元年公六十一閉門課子江都陳邑令雲
伯欲以孝廉方正薦公力辭不就足跡不入城市二
十餘年有蟄室集旋作旋塗抹之有句云年來養病
無他福興到詩惟信口吟又有句云自見虛懷聊種
竹無多老友但聞鶯丁酉公命次子先赴試春明吾
老尙健汝勿以爲念促之行時元已補 體仁閣大

學士公命弟先師事元元視其才樂教之試冬寄札於公云四弟先聰明與之談論學問頗能領會卽如三場言孔安國卒在漢武帝巫蠱事前寫入策內非試官所欲聞也公覽書而樂之戊戌冬元 予告歸田公已七十有九正月初二日公八十壽元率子稱觴和公句云喜得白頭同壽考羞將晝錦耀維揚相見時執手言歡悲喜交集蓋元時年已七十有六矣己亥春正月以湖莊久沒於水與公議築隄種柳成一別墅以娛二老因屬公子克先兩弟董其成顏之曰南萬柳堂繪圖賦詩時相遊聚種蓮忽得並蒂二

榦壬寅春杪元又置別業於道橋與公宅通相聚彌近夏平湖王子卿太守來別業一庭三老畱連竟日因手書一聯云百歲老人談舊事一庭新綠煮春茶癸卯正月二十日元八十壽辰先期來別業與公作竹林茶隱之樂旋聞 賜壽之命公精神尙健率族同叩謝 天恩且與元約曰俟二月杪賫 賜到楊子尙可來城隨跪迎敬瞻 天翰文綺闔族與邀光寵甚盛典也未幾身體軟弱飲食漸減因召子及甥及婿來曰予年八十有四不爲不壽矣汝等讀書者勵志科名習會計者守以儉約予以清白之躬飄然

揚州叢考 卅四
長往無所苦也疾革元親至橋視公公以手指曰微
矣時氣息奄奄不能出聲然耳尚聰心尚明也越一
日而逝嗚呼以公之才宜早掇科名出而爲政必能
展布乃自安時命而贊襄家祠能持大體宗族鄉黨
賴之書云惟孝友于兄弟是亦爲政奚其爲爲政公
之謂也公生於乾隆歲庚辰正月初二日卒於道光
二十三年歲癸卯四月廿七日享年八十有四元配
趙宜人繼配吳宜人副室張孺人朱孺人孫孺人長
子克國學生次子先肄業生季子克國學生少年工
詩畫孫二人慶生瑞生女九人婚配皆名族元從兄

子不敢銘叔且嫌銘石藿幽不若表出於外故爲阡
表使鄉人族人皆可拜墓而讀也兄之子元謹撰

雷塘話雨記

焦循

嘉慶乙亥夏五月癸卯阮子仲嘉招余爲雷陂之遊
其使者曰舊太守汀州伊公自江右來欲訪子於北
湖之濱而不果又不敢速子入郡城訂以月之乙巳
會於陂之阮公樓里叟曰伊公賢太守也子部民也
宜卽趨入城又一人曰不然伊公賢太守也子部民
也而不敢速子入城子宜自抗以成太守賢余故懶
又足疾樂從後一人言與使者約定以二十一日會

於阮公之樓明日夜雨迄旦雨止趨於雷陂有僧至城中來言太守將至且遣人以余至告太守與仲嘉至太守醇儒也別九年氣益醇語我數年中家居讀書少有所得思出而仕以驗所學言殊藹藹須髮視前時少蒼而精力不倦遂陪謁招勇將軍墓暨湘圃光祿墓光祿素好馬宮保芸臺制軍以石琢一馬立墓道前太守撫石馬讀碑字坐松下良久遂與訪隋煬帝陵先是陵久荒失歲乙丑宮保丁憂居墓廬尋得其處太守正守郡乃修築之太守隸書隋煬帝陵四字勒石字徑尺許立陵前今越十年矣共撫拭憑

弔復返於樓仲嘉具酒饌大風雨自西北來時農正望雨開窗觀之太守徐徐道其所學示以所刻雷副憲經笥堂文集遂縱言治平之道曰吾過多何以能寡此出何以益於民幸教我噫嘻太守誠醇儒也雨止仲嘉邀太守遊古木蘭院余不能從先行未十里大雨如箭急趨田家茅屋中則避雨者先有數人在一眇目者睨曰適見君登皇墓墩其前行者何人也皇墓墩者俗稱煬帝陵之名也余曰舊太守伊公也眾大譁曰公又來爲吾郡主矣余告以方入都來不來未可知眾愀然雨止各散去余乃歸

題阮代公先生把卷圖

前人

江都文學阮代公先生把卷圖一卷北湖阮氏自榆林衛千戶諱文廣始遷居公道橋代公先生爲千戶公會孫諱世衡博文約禮兄弟不異火而居以詩書禮讓教子弟絕去輕薄佻巧之習詳見陳鳴夏所撰北湖梓潼祠碑記康熙間北湖多博學高俊之士以文章行誼倡率里閭先生其一也先生生三子長諱應武康熙甲午武舉官德州衛守備娶於循從伯曾祖之子生三子長諱承勳太學生生子嗣環而以季女女循故循悉阮氏軼事太學公仲弟諱承杰爲叔

父康熙癸卯武舉諱大武後生子嗣璟季弟諱承熙爲叔父邑文學諱畫堂後生四子奎嗣琇嗣琳嗣球世守此圖寶而藏焉宮保芸臺撫部爲代公先生曾從孫作讚命其公子常生以示循嘉慶二十一年夏五月四日公子自江西節院歸携圖訪我雕菰樓循敬展卷焚香北面再拜瞻仰因爲之記是圖正面盛衣冠坐石上左手持卷右肘隱石兩丹履踐芳草間面橫羨於從兩權隱出眉目秀脰豐頰微髭神色靜而和充而斂莊而不拘約四十許歲時不著繪者名氏原題讚者九人畢銳字穎君康熙甲辰進士官貴

州平壩衛守備作讚時年八十一范荃字德一處士自號盟鷗野老陳廷相字浩海一字百師邑增廣生文九皋字秋翎號香城邑學生皆居北湖王暮字戩西號蔗堂亦嘗居湖見所贈范荃詞魯金鉉字上公自稱淮海一放人題云上章執徐之夏六月自湖郵郡索題則城居者也未詳湯有光字茗仙爲竹西十逸之一劉孫發號心庵徐源字思遠號秋冶高天驥字千山號凜齋陳題於己卯畢文高題於庚辰范題於辛巳辛巳爲康熙四十年距今嘉慶丙子凡百十有五年

公道橋鎮北湖耆舊祠銘

并序

阮 充

大清道光元年倉龍在辛巳冬十月兩廣總督今體仁閣大學士阮元建北湖耆舊祠於公道橋鎮越十有七年從弟充序而銘之充聞魯叔豹有言太上立德其次立功其次立言此之謂不朽卽禮經法施於民則祀之者也北湖自明以來名宦大儒後先繩武王吏部之淹通高僉事之忠節阮將軍之剛毅固宜載在典祀有舉莫廢其餘諸子敦詩書宏作述慎言行飭廉隅亦足以矜式一鄉光於史策詩云雖無老成人尙有典刑其舊斯之謂矣謹申仰止爰製斯銘

銘曰

江淮糧道通於勾吳百川會之匯爲北湖才華忠義
日月爭光經文緯武甲科騰驤非曰甲科更有隱逸
春誦夏絃呻其佔畢五正九宗言規行矩莫其德音
稱先則古華裾玉珮抑抑威儀清風無斃嘉薦維時
其殺伊何維魴及鱸其菽伊何維菰及蒲昭格不遲
甘我飲食佑啟後人紹聞衣德有寢有堂上棟下宇
山色湖光靈氣所煦自今以始宜稼於田實堅實好
迄用康年齋宮翼翼執事丕承銘諸樂石文獻足徵
奉直大夫滋圃談公傳

天長陶汶 察甫

談春培字滋圃其先世守教公諱愷無錫人明嘉靖
丙戌進士官都察院左都御史總督兩廣軍務贈兵
部尙書至珮甫公諱珊 國初始遷揚州之前江都
縣今甘泉分縣僧度橋北鄉公會祖諱存義字性庵
舉鄉飲食祖諱杰字伯玉 恩賜九品世承先德善
畏人知生二子長東林字慶雲次西林字慶雲太學
生慶雲早逝以公繼其後慶雲卽公之生父也皆以
公職 晉贈奉直大夫公幼慧善讀凡遇經史如舊
識焉文愛江都長沙賦宗平子太冲詩祖少陵嘉州
詞習易安白石時文非金嘉魚陳臥子熊次侯方百

揚州叢考 井湖
川不讀也年十六應童子試完卷第一學使姚秋農
先生閱其文擊節歎賞指謂廣文范公曰此子奇才
且在冲齡若令遽入芹宮轉恐自躋不前當暫抑之
俾令勤學以益其修儲爲他年偉器聞者豔之以爲
雖屈猶榮公亦自謂此試較甚遊庠尋以家政繁多
不能理童子業初補國學生員進職布政司理問歲
時稍暇與屠太守琴鳴吳探花笏齋浦都尉情田伊
明府少穆唱籌刊上蜀岡朝旭荷浦薰風月夕花晨
一時稱盛公生平著作不自存稿多貯藏於往來賡
和之家容搜羅而編輯焉公性孝友能容衆人有過

失不卽責斥恆婉言霽色加用引喻使知愧悔或親
族中有無力讀書及無力婚嫁者必多方捐助以成
全之里黨孤寒門庭僮僕解衣贈粟率以爲常好施
樂善之名達於遠邇惜乎其年不永閱歲二十五夢
受東王公詔而卒卒之日聞訃者靡弗哀傷墮淚子
淵短命伯魚早亡雖未敢舉以相衡而視王子安之
序滕王李昌谷之修玉樓殆亦可並傳於千古云公
弟春元字允齋直隸州同知善書法工詩三弟春發
字育亭國子監生俱承祖德紹兄業立名砥行罔墮
乃志公無出春元以長子恩誥繼公大宗駟門啟後

之祥其預兆於公之積善也乎

藝文 節孝詩

題房孝子墓碣後

江都陳儼敬輿

大孝本庸德苟難非所矜聖人未可學流俗只愛身
 不與睹奇行曷以激天真房君農家子幼事牧與耕
 愚不讀詩書樸不愛聲名炯炯一腔內但知父母恩
 親在與俱活親亡不獨生一割動天地先以母病割股再割
 泣鬼神繼以父病割肝忍痛從父役臥創趨母頃卒亦歸全
 受豈虞佑窈冥孝子仆於田扶歸創臥數日後自愈數年病歿至性有如
 此其他寧具陳彬彬衣冠侶熙熙草野氓孰無毛裏
 愛孰無孺慕情孰能承厥志孰能養厥躬隨分盡可

勉所難葆赤心房君何如者思之淚盈巾惜哉自毀
傷不得邀 恩綸子為請錄乘愧慕有餘忱書茲表
墓碣千載感行人

青白線 裔烈娥事詳小志

倪岱

涇水清渭水濁澄清安肯受齷齪杜香蕭艾臭氣
味何容竝階茂裔家女子年廿一曾經刲股療父疾
結婚孫室甘食貧淚痕幾見青蛾濕不料古井寒波
起老姑少姑隨風靡由來白玉涅不溜彼汙此潔何
能毀歸寧悲訴兒欲死母問諱言姑作事但取母筐
青白線謂將此物明兒志歸來犬彘紛相逼暗縫衣

袂防身密一縷分明斷命絲苦情恨不向夫別事聞
當軸表清白肆筵載拜妥幽魄貞坊高豎平山西頓
使鬚眉愧巾幗吁嗟蹇命甘荼苦彩鳳隨鴉誓不許
至今生氣凜千秋女貞一樹花朝暮

施銓

貞魂幽憩古江濱池霍碑前馬鬣親苦海同參龍樹
偈驚颺獨際火蓮輪鴛鴦掠削逃金彈干莫淒涼赴
劍津不是清操箴薄俗椒漿難折宰官身

焦廷琥

白茆湖水平如掌萬頃雲煙自來往深閨有女人未

揚州叢考 卅六
知養親割股年初長東家桃李鬪容光羅綺笙歌繞
畫梁高樓夜夜人如月深巷年年草自長秋深齊女
欣同織春晚羅敷不采桑花惜豈歌金縷曲女貧空
作嫁衣裳春來秋去傷青草納徵不問誰家好乘馬
雖殊霍氏奴賣漿卻在邯鄲道裙布荆釵亦可安糟
糠布帛方同保唱隨豈必埽蛾眉輕許何嘗怨兄嫂
初諧寶鏡鳴高閣詎料堂前叫姑惡少年聚室共歡
呼晝作高歌夜飲博新婦房中淚暗垂小姑筵上釵
初落雌雉飛鳴亂薄帷雄狐撲朔欺孤弱明月寧因
濁水汗精金豈被刀圭錯開箱青白兩條線萬古綱
烈綿綿不記年

湯氏節孝詩

錢塘 陳文述 雲伯

常從此托揚州太守稱名賢立祠高祀平山巔諸淫
何幸得漏網烈蛾名亦傳青編青山嶽嶽力能削此
題邗上湯氏二節婦一孝子詩謂節婦曹氏及姊
朱氏猶子世泰也曹氏 旌於乾隆初年朱氏世
泰余爲請 旌
歷盡冰霜轉太和邗江當日有曹蛾更看奕世芳徽
在母氏松筠子蓼莪

廿年宦轍歷三吳到處輜軒總式閭記取蕪城雙綽

楔幾番剪燭手親書

甘泉 吳 康 少文

苦節追思數十年養生送死尚依然母能立志同金
石孫自逢時泣几筵白髮對燈勤夜織青裙扶杖課
山田一身竭力持門戶克荷 旌揚達九泉

弔里堂竝令嗣虎玉

嬾踏春明逸興賒懷鉛握槧老窗紗別開生面吞三
書孝廉著易學三書行世獨具靈心創一家扶杖時迎人乞米
閉門不拒客看花胸襟坦蕩如湖水贏得通儒四海
誇阮制軍撰揚州通儒焦君傳

醫藥雖知病已深一時回首渺難尋檻花春放空迎

月亭烏宵歸莫聽琴軼事尚傳田父口遺編猶入相

臣心英尚書索最憐今日淒風繞又見佳兒別故林

煌煌著作疊空箱虎玉臨終以父書未刻為恨齋恨泉臺去太忙

死不忘親無愧孝生能承業自餘芳虎玉見賞湯學使有家學淵源

之一門風雅推吾里兩代淪亡慘客腸遺跡尚留茅

屋壁虎玉曾為余作白茆草堂記欲看先覺淚沾裳

甘泉 王開業 偉儒

青燈如豆照空房黃鵠歌成黯自傷風雨淒涼魂獨
絕邱山寄托志能償宗祧一線延餘澤巾幗千秋植

大綱凜凜墓門松柏色至今炎夏結冰霜

卞節母王孺人詩

江都 錢嗣遠 問衫

全受全歸著令名卅年玉潔更冰清范姬未免傷遺體似此還家利女貞列女傳吳孫奇妻者廣陵范慎女名姬年十六配奇一年而亡慎以姬少寡無子迎還其家姬不肯歸迎者以父母命迫之姬遂操刀割耳及鼻曰父趣我者不過以我年少而色美今已殘矣

行將焉如迎者空返

探訪闡幽思太守

謂李太守璋煜徵詩表德賴王郎

王君開益為節

母至今淚滿西江水流到邗溝引恨長

甘泉林溥少紫

翠蘿霜隕鴛鴦幃鏡臺月缺孤鸞飛孤鸞飛集女貞

樹漆燈照見重泉路重泉路風瀾瀾妾身未亡妾心死茹蘗飲冰春復秋古井波瀾誓不起

杜鵑血染春花紅鸞絲聲脆悽孤桐十六賦鳴雁鳴雁何嗷嗷十七歌黃鵠曲竟生悲風青廬未撤苦席易一載之中失夫婿吁嗟夫死無遺孤悲哉白髮雙舅姑夫無藐孤尚可繼白髮思兒傷妾意

翁官西江但飲水清風一舸歸來矣歸來四壁何蕭然廉史夫婦雙歸泉雙歸泉妾心悲婦兼子職妾能為陳門異爨家中落敝廬風雨妾安託妾家舊住東湖東菖蒲繞舍廬生叢歸來拜雙親逡巡緬疇昔掩

袂承歡娛酸辛撫弱息弱息長成妾淚枯機聲軋軋
孤燈孤黃泉能鑒妾心無

鬱鬱青松林哀禽集其枝
峩峩懷清臺過者生悲思
綽楔玲瓏巨雲起松操竹節光
彤史誰其表之太守
李河之水何湯湯揚素波流清芳
柏舟一賦千秋香
君不見卞家節孝婦母氏大姓珠湖王


揚州北湖續志卷六終


第 版

恒和少不學 先君廣全公家邑東南十餘里五港
洲之東一圩自隱於農鄉人稱為長者 先母楊克
諧高志有古梁孟之風所以訓迪恒和者至今不敢
忘念終不能有所成就以報所生每自愧責妻氏楊
字曰恒娘弱於余六歲恒和今年五十有二恒娘體
益弱余亦亦寢衰老感白駒之過隙嗟淹留而無成
念余所業書也書者前人精神之所聚而賴後人以
為之傳者也昔賢有言刻古人遺書者其功等於掩
骼埋骹竊考吾揚藝文志其涉及一郡掌故之書至
夥而斷簡遺篇零落殆盡或已為叢書所收入者非

重金莫能致其單行本流傳既尠而傳鈔本及稿本則尤易湮淪不及時衰而聚之刻而布之則一瞬間將與塵埃飄風而俱逝余幸業於此力之所能即責之所在也曷敢不勉第手民之資板片之費無所從出謀之恒娘恒娘大喜遽出私蓄以佐其成於是搜集先哲所著凡廿四種底本別寫付刊命子履恒職校勘之事五閱寒暑乃克畢工余垂老無聞庶幾存鄉邑之舊聞彰先民之高矩以答父母以慰余妻若云與有功焉則吾豈敢

民國二十三年冬十月書林陳恒和謹識





26109

2/11

